



DEO OPTIMO MAX.

UNI ET TRINO,

VIRGINI DEIPARÆ, ET S. LUÆ

Orthodoxorum Medicorum Patrono.

# QUÆSTIO MEDICA,

QUOD LIBETARIIS DISPUTATIONIBUS  
manè discutienda, in Scholis Medicorum, die Jovis decimo-  
quinto Januarii anni M. DCC. XXXIII.

M. PETRO-JOANNE BURETTE, Regis  
Consiliario, Medico & Sub-Bibliothecario, in Regio  
Franciæ Collegio Medicinæ Lectore ac Professore,  
è Regiâ Inscriptionum & Humaniorum Litterarum  
Academia, Quatuor-viro conscribendi Eruditorum  
Diarii, Regio Librorum Censore, Doctore Medico,  
Præside.

*An refusa in Sanguinis alveum Pinguedo cedat in Corporis nutrimentum:*

I.



IC à naturâ comparatum est Corpus humanum, ut per-  
petuo fluxu dissilientur & avolent illius liquida, solidæ verò  
partes deterantur sensim & abradantur. Hinc brevè tota  
machina corrueret, penitusque fatisceret, nisi perpetuâ  
novi accessione pabuli foveretur citò labentis vitæ flam-  
mula. Quamdiù molles adhuc & tenellæ fibræ motui cordis & arteria-  
rum succum nutritium impellenti obsecundant, tamdiù in omnem di-



2  
mensionem augetur corpus, & est accretio. Si verò jam ad *dehinc* pervenerit, neque facile cedant firmatæ partes, tunc solummodò nutrirî dicitur. Cave tamen existimes quamlibet materiam seu augendæ, seu reparandæ Corporis nostri substantiæ esse idoneam. Quantula pars ingestorum alimentorum huic muneri par efficitur! Quot & quàm variis agitanda & versanda modis quæcumque *molecula* in Corporis nutrimentum destinatur! At quoquo modo misceantur, terantur, Vasorum oscillationibus diverberentur humores, qui fluunt in Arteriis & Venis, nondùm tamen jure dixeris nutritios, nisi ejus sint indolis, ut in substantiam nostram facessere valeant.

## II.

**N**UTRITIONIS opus quo pacto absolvatur, attentus considera. Perpende quantà curâ provideat sedula parens Natura, ne quid sibi minis consentaneum admittat. Chylum perennandæ vitæ dicatum fomitem ope digestionis in Ventriculo inchoatum, in duodeno deindè perfectiùs elaboratum excipiunt exigua Vasorum lacteorum orificia. Tùm varias ille trajiciendo glandulas magis ac magis attenuatur, lymphâque simul permixtâ diluitur. Demùm ex communi receptaculo canalem Thoracicum ingressus in patentem Sanguinis alveum transfunditur. Ibi cordis & arteriarum impulsu quassatus & agitatus, Vasorumque *pulmonalium* pressioni commissus partim in globulos effingitur, partim *gelatinosam* formam induit, partimque serolus remanet. Quorsùm hæc omnia? ut partes ad nutriendum idoneæ à cæteris expeditæ & sejunctæ jugiter avolantes particulas supplere possint. Sic enim præparatus & sui juris factus nutritius humor arteriorum lateralium *poros* subit, ultimum Vasculorum parietibus adhærescit, spissescens agglutinatur, & in propriam Corporis substantiam convertitur. Sic aut eadem perseverat Corporis moles, aut etiam in majus excrefcit.

## III.

**S**I consuetis defraudetur aliquandiù Corpus alimentis, nec, quas patitur indefinenter, jacturas resarciat; primùm exhalantur fluidiores particulæ. Tùm solidæ sensim deteruntur, angustantur Vasa, cutis frequentibus sulcata rugis flaccescit. Nimirum pinguedo & succi, quibus fibræ turgébant, paulatim in Sanguinis massam refluunt, penitusque dissipantur. Num dubitas pinguedinem refluere? Attende morbo tentatum corpus quàm celeriter emacrescat; observa Sanguinem in Venis *unctuosum* esse magis quàm in arteriis, urinisque Tabidorum pinguedinis guttulas innatantes manifestò conspici. Hæc autem refluæ materies, quò sæpiùs motu circulari abripitur, acrioribus & salinis, quibus tunc Sanguis redundat, partibus magis magisque attenuatur & per cutis *poros* avolat. Undè tunc temporis crassiori & fœtidiori sudore squallida cutis est. Sed fac leniori motu circumferri pinguedinem, nequaquam tamen in fibras, membranas, musculos concrefcere poterit, nec in Cartilagine & Ossâ indurari. Non eam quippè *ductilitatem* acquirere valet, quæ

3  
necessaria est, ut in has partes solidescat. Conferatur enim cum lymphâ, quam veram ac genuinam esse nutritionis materiem omnes agnoscunt & fatentur. Hanc si calori exposueris, diffilatâ tenuiori & aquosâ parte, quod residuum super fuerit, jam ductile, jam *filamentosum* ac propè membranaceum erit. Pinguedo, si eodem modo tractata fuerit, jam tota fusâ magis ac magis liquecet, nedùm concresecat.

# I V.

DUM corpus benè constitutum, nec fibris donatum rigidioribus cibis pascitur euehymis, nec duro labore frangitur, neque curis aut animi mœreore conficitur, maximam tunc pinguedinis molem cumulat. Quid ita? Pars oleosa sanguinis placido motu circulantis, cùm redundet, appellendo ad membranam adiposâ in ejus sacculos deponitur. Non unâ in parte tantùm reperitur ejusmodi membrana. Proximè cuti subjecta totum ferè corpus obvolvit. In intimas etiam cavitates usque penetrat eadem non interrupta; cùm status in eam immisissus interiores quoque simul distendat. Omentum verò præcipuum videtur secretæ pinguedinis receptaculum. Hoc viscus duabus constat lamellis tenuissimis, quas mille complicatâ modis arteriarum & venarum propagines perreptant, innumerisque distinguunt areolis. Nec abîmili membranâ vestiuntur etiam internæ ossium cavitates, in quibus pinguedinis species quædam Medulla dicta secernitur. Hæ membranæ plurimis constant cellulis in se invicem hiantibus, in quas ex ultimis arteriarum finibus exsudat adiposa substantia. Hæc per morbum aut inediâ uberius in sanguinem per venarum capillamenta resorbetur. Neque enim verisimile est dari peculiare ductus, quos observasse sibi visus fuerat Malpighius 1, cùm eos ipse postea in dubium revocaverit 2, nec admittendos censeant recentiores Anatomici 3. Non tamen ideò refunditur in venas, ut partes absumptas reparet. Corporis enim solidæ partes lymphâ nutriuntur, à quâ originem ducunt, & in quam faciliè resoluntur. Carnes simplici coctione in pulvem *gelatinosam* & lymphæ spissioris æmulam, non in pinguedinem abeunt. Quin & ossa vel durissima ope machinæ Papinianæ in eandem ferè substantiam facescunt. An igitur corpus humanum eâ parte constet, quam non reddat simplicior Analysis?

1. Exercit.  
de omento,  
&c.  
2. In oper.  
posthum.  
3. Morgag.  
adv. Anat.  
Heist. comp.  
Anat.

# V.

NON tamen sine consilio certis in partibus copiosorem pinguedinem concessit Natura sagax & provida. Hanc oleosam substantiam grandiorum ossium cavitatibus indidit, quâ hæc emollita & lubricata obviatorum corporum incurfu minis faciliè frangerentur. Eam quoque variis museulis interstravit, uti forent ad omnes motus flexiliores. Hæc eadem totum Omentum scatere videas, tùm ut bili constituendæ inserviat, tùm ut certa ejus portio venam cavam ingressa per univèrsam corpus assiduo circuitu feratur. Enimverò pinguedinis globuli sanguini supernatantes tùm in arteriis 1, tùm in venis 2 observantur. Quòd nisi res ita se haberet, jam soluta sanguinis compages, extri-

1. Morgag.  
adv. Anat.  
1.  
2. Malpigh.  
de omento,  
&c.

3. Mem. de  
l'Acad. des  
Sciences.  
ann. 1700.

caris salium spiculis, partes nervosas ac membraneas permolestè lancinaret, undè malorum uberrima scaturigo, uti videre est in Phthisicis. Undè enim tam citò emaciantur & contabescunt, nisi quia illorum sanguis partibus oleosis, quibus irretiantur ejus principia, ferè orbatus, membranas omnes morderet, pungit, vellicat. Tunc autem si quid pinguedinis in sacculis adiposis coacervatum fuerit, illud brevi liquatur & solvitur, ut in sanguinem refusum ejusdem acrimoniam contemperet ac retundat. Nec alia ratio asserri potest, cur istis in casibus aegrotos tantoperè juvent pinguis & oleosa. Hæ sunt adipis dotes, hi sunt usus. Ossium medulla ab reliquâ pinguedine non-nisi majori tenuitatis gradu discriminari videtur, lisdem subjacet vicissitudinibus, nec pro variis Lunæ phasibus, juxtâ vulgi opinionem, sed pro majori aut minori corporis exercitio, lautioribus vel auriorebus cibis, augetur & minuitur. Nec ossibus nutriendis impenditur, ut crediderant Hippocrates & Galenus. Dantur enim vasa sanguifera, quæ internæ ossium substantiæ succum nutritium impertiantur, quemadmodum & in reliquis partibus.

*Ergò refusa in Sanguinis alveum Pinguedo non cedit in Corporis nutrimentum.*

## DOMINI DOCTORES DISPUTATURI.

M. Claudius de la Vigne  
de Frecheville, Regis  
Medicus & Domus Re-  
gina ordinarius.

M. Joannes - Damianus  
Chevalier.

M. Ludovicus de San-  
teul.

M. Emmanuel - Mauri-  
cius Duverney.

M. Ludovicus - Claudius  
Bourdellin, Scholarum  
Professor designatus, è  
Regiâ Scientiarum  
Academiâ.

M. Claudius Brunet.

M. Joannes Bessè, Do-  
ctaria Hispaniarum Re-  
ginae à Consiliis, & Me-  
dicus primarius.

M. Antonius de Jussieu,  
Regiæ Scientiarum Acad-  
emia, Regiarumque  
Societatum Angliæ &  
Prussiae Socius, in Hor-  
to Regio Parisiensi Bo-  
tanices Professor.

M. Joannes-Baptista Sil-  
va, Salubris Consilii  
Regii Socius, & Sere-  
nissimi Ducis Borbonii  
Medicus.

autor

Proponebat Parisiis OLIVARIUS BOUGOURD  
Constantiensis, Baccalaureus Medicus.  
A. R. S. H. 1733. à sextâ ad meridiem.